

EN CAMIN

Pèr barrula avès l'atestacioun de desplaçamen derougatòri escricho en lengo nostro... (pajo 11)



Prouvènço d'aro

Tóuti li mes, lou journau de la Prouvènço d'aro

Desèmbre de 2020

n° 371

2,10 €

ITER III

Un Souleiet sus Terro
Lou voulume III dóu manga ITER vèn de parèisse

Un novèu voulume dóu manga sus ITER vèn d'èstre publica en prouvençau. Li dous proumié voulume nous faguèron descurbi lou prougramo ITER, istala à Cadaracho, au cor de Prouvènço, qu'a pèr toco de reprodurre li reacioun nucleàri de fusioun que se debanon dins lou soulèu. D'aquí lou titre dóu manga "Un Souleiet sus Terro", qu'en Prouvènço, lou soulèu es jamai liuen.




Dins aquest tresen voulume, nòstis eros Taiyo e Souleano nous enmenon, aqueste cop, dins l'autre Empèri dóu soulèu, aquèu dóu Soulèu levant! Segur, emé un Souleiet sus Terro, se pòu pas desparti dóu soulèu. Dins aquest voulume, poudras vous familiarisa emé de teinico industrialo draiarellò, emé lou magnestisme e la supra-counditivita, vous rèndre comte un cop mai de la taio dóu reatour e comprendre coume li pèço dóu reatour soun pougido pèr lis Estat mèmbe à l'entour dóu mounde.

Mai, subre-tout, sara pèr vous l'escasènço de se descounfina, de viaja à l'autre bout dóu mounde, de prendre l'avioun e lou batèu, de se despaisa. Tastarés à la toufourasso japouneso, que sèmblo bèn diferènto de nòsti caumasso, au ramen japounés... o bessai que noun, e au monozukuri, que se sabès pas de qu'es, basto de legi lou manga. En tout cas, sèmblo que li Japounés tènou aquesto qualita de tremuda cado causo de la vido vidanto en un art de vièure.

Li tres voulume se podon telecarga d'à gratis sus lou site de l'agènço doumestico japouneso d'ITER http://www.fusion.qst.go.jp/ITER/comic/page1_1.html, que publico toujour gentamen li reviraduro prouvençalo dóu manga.

Terris Cerisier

L'enavans de Cadaracho



Lou separatisme abandouna

Lou proujet de lèi que se disié "contro lou separatisme" a vira caloto, lou gouvèr que vèn de n'en trasmetre lou tèste au Counsèu d'Etat l'a bateja aro "projet de loi confortant les principes républicains".

Fau entèndre, à miech aire, bouto pèr barrau... Acò apouncho pas un fust, mai es acoumoudant... estènt que l'article 6 ié vai de dire que pèr lis associacioun: "toute demande de subvention fait désormais l'objet d'un engagement de l'association à respecter les principes et les valeurs de la République".

Adounc acò pertoco pas lou separatisme catalan, basque, corse vo òcitan... Es

d'istòri anciano passado dins lou foulclore regionalisto, parié pèr la separacioun de la glèiso e de l'Etat manjo-crestian de 1905. Segur que despièi l'anòncio d'aquéu proujèt, escoutelage e mourtalage faguèron l'empèri...

Belèu que pèr acò lou President que fasié l'aboundous pèr faire ensigna la lengo dóu país d'ourigino, aro tèn sa lengo... Se n'en parlo pas dins soun proujèt... Sai-que, sarié pas un principe republican!

Ansin pèr nous-autre aquelo voutacioun que se devrié faire lou 9 de desèmbre a plus gaire d'interès, se dira pas rèn sus l'ensigna-men di lengo... que se decidara pièi à la chut

chut bèn mai facilamen pèr éli. Basto! Aquelo proupousioun de lèi sèmblo un pedassage de decret è òutri reglamen anterior, emé pamens, estounadamen, uno meno de casso à l'ome vivènt en esta de pouligamio, s'es un ressourtissènt estrangié, soun doucumen de sejour ié sara retira... Vai-t'en prouva aquel estat de pouligamio! Mai avans que de chausi sa femo poudra plus verifica sa santeta. D'aro en lai, soun medecin poudra plus "établir de certificat attestant la virginité d'une personne".

Es lou principe republican de liberta e fraternita que lou vòu? De tout biais òcupara li deputa e senatour uno bono vòuto de tèms.

La Mar de nòsti lengo

Lou Mediterragno n'a entendu de mounde barjaca d'uno ribo l'autro.

Pajo 2

L'anniversari de Marius Bourrelly

Se pòu pas óublida aquèu pouèto tant fegound, l'Atlas de Frederi Mistral...

Pajo 9

Dedu d'un viage en Alaska

Noste barrulaire s'entourno d'aquéu país de nèu e de glaço...

Pajo 7